

INUIT ATAQATIGIIT

Inatsisartuni



UKA2019/Imm. 127

15. oktober 2019

Mimi Karlsen

Naalakkersuisut Atuarfik pillugu Inatsisartut inatsisaannik allannguissaminni atuarfimmi klassimi ataatsimi atuartut annerpaamik 18-inik amerlassuseqartalernissaannik qulakkeerinneqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Peter Olsen, Inuit Ataqatigiit)

Inuit Ataqatigiit anguniarpaat meqqat amerlanerit atuarfimmit angusaqarlutik atuarunnaarnissaat, - taamalu ilinniagaqarlutik suliffeqalernissaat. Ilinniagaqarneq inuunerissaarnissamut aqqutissiusseqataasarmat.

Meeqqat atuarfianni atuaqatigiit ikittunnguugaangata meeqqat ataasiakkaat ilinniartitsisumit sammineqarsinnaaneri periarfissaqarneruvoq. Qujanartumik nunaqarfinni illoqarfinnilu minnerusunik atuaqatigiit ikittunnguusinnaasarput. Illoqarfinnili inuttunerusuni meeqqat atuaqatigiit ilaanni 26-usinnaasarput. Taakku amerlavallaarput.

Meeqqat atuarfiani inatsisaavoq meeqqat ataasiakkaat pisinnaasaat aallaavigalugu atuartitsisoqartassasoq. Tamanna tappiffiusinnaanngilaq meeqqat atuaqatigiit amerlavallaarpata, taasami meeraq ataasiinnaq sammineqarsinnaajunnaassaaq sammineqarnissamut utaqquisut 25-ussammata.

Meeqqat atuarfiani inuiaqatigiinni inuit assigiinngitsuuneri malunnarluartarpoq. Meeqqat atugarissaartut, angajoqqaaminnit maluginiarluarneqartut meeqqallu inersimasunit sumiginnakkat, isumagineqanngitsullu atuaqatigiittarput. Tamanna ilinniartitsisuumut assut ilungersunarsinnaasarpoq. Meeqqat immikkut malugeqqusut piffissaqarfiginiarneqarpata soorunami aamma nammineernerusinnaasut isumakkeerneqarsinnaasarput. Ilinniartitsisup kisimiittut tamaasa sammilluarsinnaanngilai, taamaalillunilu ilikkartitsiniaaneq ajornakusuussalluni.

Meeqqat atuarfianittaaq anguniarneqartarpoq meeqqaat oqaatsinik arlalinnik ilikkarlutillu atuisinnaanissaat. Tamanna ilungersunarsinnaavoq, tassami meeqqat assigiinngeqisut tamaasa assigiimmik ilikkartikkuminaapput. Allamiut oqaasiinik ilikkarluarnissaq piffissarujussuarmik atuiffiusariaqarpoq. Meeqqat ataasiakkaat piffissamik sivisunerusumik ilikkarnarsinnaanissaannut periarfissittariaqarpagut. Meeraq ataaseq piffissaqarluarfigineqartariaqarpoq.

Ilinniartitsisutaaq atuartitsinermi saniatigut immikkut isumagisassaqartarput. Angajoqqaat, isumaginnittoqarfik alallu suleqatigisat aamma suliaqarfiusaqimmata. Atuaqatigiinni 26-usuni immikkut pisariaqartitsisut amerlappata ilinniartitsisumut suliassaq annertuallaartarpoq.

Ilinniartitsisoq ilikkartitsinissaminut piareersarluartariaqarpoq. Atuartitsinerulli saniatigut allarpassuarnik suliassaqarpat atuartitsinissamut, ilikkartitsilluarfiusumut ilinniartitsisoq piffissaaruttarpoq.

Taamaammat meeqqanik atuartitsinermi ilikkarluarfiusoq anguniaraanni atuaqatigiit ikinnerit atuartinnerusigut angujuminarnerusaaq.

Nunatsinni atuaqatigiit ikilinerisigut atuaqatigiiaat amerlasoorpassuit pisariaqartinneqalissapput. Nunatsinnut akisussaaq, ilinniartitsisunillu amerlanerusunik pisariaqartitsissaaq. Aningaasliinerli imminut akilissaaq oqarsinnaangorutta meeqqat amerlanerit atuarfimminniit naammassinnilluartut amerlippata, ilinniarfinnut ingerlaqqissinnaasut amerlippata, nunatsinnilu ilinniarsimasut amerlippata, - taava imminut akilertoq oqarsinnaannguussaagut.

Naalakkersuisut akissuteqataanni erseqqarippoq ilinniartitsisussaqarniarneq, aammalu ilinniartitsisut amerlippata akisusinnaanissaa aallaavigalugu siunnersuummik itigartitsisoqartoq.

Inuit Ataqatigiit pingaartilluinnarparput, timitalerusullugulu meeqqat atuarfianni meeraq ataaseq aallaavigalugu ilikkartitsiniartarnerup ingerlanneqartarnissaa. Naalakkersuisut isumaqatiginngilagut meeqqat atuarfianni aningaasaliinaveersarnissaaq peqqutigalugu meeqqat qitiutinnginneqarnissaat. Inuit Ataqatigiit pingaartilluinnarpaat meeraq qitiutillugu, piffissaqarluarfigalugu ilikkartinneqartarnissaa. Sumiluunniit meeqqat atugaasa pitsanngorsarneqarnissaat pingaartutut isigaarput.

Nunanut allanut sanilliulluta nassuerutigereerparput meeqqat amerlavallaat kinguaassiutimikkut atonerlunneqartartut, meeqqat amerlavallaat angerlarsimaffiup avataanut inissinneqartartut. Meeqqat amerlavallaat inersimasunit naammaginantumik isumassorneqanngillat.

Taama nassuereeratta taava meeqqat ataasiakkaat pitsaanagerusumik meeqqat atuarfianni piffissaqarfigineqarnissaat anguniartariaqarparput. Tamannalu ilaatigut angusinnaavarput meeqqat atuaqatigiit amerlavallaannginnissaat aalajangiukkutsigu.

Inuit Ataqatigiit ataatsimiitsitaliami suliap allannguuteqarsinnaanissaa ammaffigaarput. Atuaqatigiit 26-unatik ikinnerunissaanut sulinermi isumaqataasinnaavugut.

Inuit Ataqatigiit anguniarparput meeqqat amerlanerit ilinniarfinnut amerlanerusunit ingerlaqqittarnissaat, nunatsinni ilinniarsimasut amerlinissaat, taamaammat siunnersuut akuersissutigaarput, ataatsimiitsitalamullu susassaqartumut iingerlteqqillugu.